

Policija bez opreme, a migranti zaraženi



Policija u USK-u, koja je preko svojih ruku premetnula više od 10.000 migranata u 2018. godini, odavno zahtijeva opremu za rad, a dosad je dobila samo gumene rukavice i papirne maske, dok sredstva za dezinfekciju nema, iako među migrantima vlada epidemija šuge, a tu su i tuberkuloza, hepatitis, HIV.

Policija je nedavno i štrajkovala, tražeći samo malo jači bod na plaću te novu opremu i zaštitu na poslu. Sve se završilo na obećanjima kantonalnih vlasti, jer se navodno očekuju i ova sredstva iz Sarajeva. Međutim, kako saznajemo iz naših izvora, milion za policiju neće ići za uniforme i sredstva za policajce, nego za sistem nadzornih kamera za kontrolu građana i brojeva registracija na vozilima. Time se pojačava kontrola građana Unsko-sanskog kantona, a ne migranata. Ove informacije, navodno, poznate su vlastima, ali i parlamentarcima koji su se izborili za usvajanje zaključaka.

– Iskreno, mi smo se sve vrijeme zalagali za policiju, ali koliko smo razumjeli, izgleda da je ipak njima prioritet taj sistem nadzornih kamera, kazao nam je jedan parlamentarac, koji je prisustvovao razgovorima sa predstavnicima vlasti u USK-u.

U policiji o tome ne znaju ništa. Kako nam je kazao predsjednik Sindikata policije USK-a Mahmut Alagić, oni nisu obaviješteni o planovima kada je u pitanju opremanje policije za rad s migrantima.

– Znam samo da nam treba oprema, a nismo ni u ljudstvu popunjavani. U ponedjeljak ćemo imati sastanak sa Ministarstvom pa će nas informisati dokle su stigli sa našim zahtjevima, istakao je Alagić.

Date: 19-05-2019